

漢魏六朝百三家集

晉

陸清河

第三十八冊

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

V. 38

集賢堂

陸清河集

陸清河集題詞

士龍與兄書稱論文章頗貴清省妙
若文賦尚嫌綺語未盡又云作文尚
多譬家猪羊耳其數四推兄或云瑰
鑠或云高遠絕異或云新聲絕曲要
所得意惟清新相接士衡文成輒使

弟定之不假他人二陸用心先質後
文重規沓矩亦不得已而後見耳哲
昆詩匹人稱如陳思白馬士龍所傳
四言偏多有皇思文諸篇誦美祁陽
式模大雅類以卑頌尊非朋舊之體
餘篇一致間有至極使盡其才卽不

得爲韋侯諷諫仲宣思親顧高出補
亡六首則有餘矣宰治浚儀善察疑
獄佐相吳王屢陳讜論神明之長諫
諍之臣有兼能焉士衡枉死遂同隕
墮聞河橋之鼓聲哀華亭之鶴唳巢
覆卵破宜相及也集中大文雖少而

江漢同名劉彥和謂其布采鮮淨敏
於短篇殆質論歟

婁東張溥題

陸清河集目錄

卷之一

賦

南征賦

有序

登臺賦

有序

愁霖賦

有序

喜霽賦

有序

歲暮賦

有序

逸民賦

有序

羊腸轉賦

寒蟬賦

有序

啓疏

諫吳王起西園第宜遵節儉啓

又疏

諫吳王起觀疏

請吳王引師友文學觀書問道啓

又啓

請吳王入朝啓

請吳王覆校諸官啓

請防不法啓

書

移太常府薦張瞻書

答車茂安書

與戴季甫書

又

又

又

又

又

又

與張光祿書

又

又

與朱光祿書

與嚴宛陵書

與楊彥明書

又

又

又

又

又

與陸典書

又

又

又

又

又

又

又

又

又

弔陳永長書

又

又

又

又

弔陳伯華書

又

春節帖

與兄平原書

又

又

又

又

又

又

又

又

又

又

又

又

又 又 又 又 又 又 又 又 又

又 又 又 又 又 又 又 又 又

又

又

又

又

又

又

卷之二

贊

榮啓期讚有序

箴

逸民箴 有序

碑

泰伯碑

頌

登遐頌 有序

盛德頌 有序

祖考頌 有序

張二侯頌 有序

誄

吳故丞相陸公誄

晉故散騎常侍陸府君誄

晉故豫章刺史夏府君誄

文

嘲褚常侍文

牛責季友文

騷

九愍

脩身

涉江

悲郢

行吟

紆思

考志

感逝

征

詩

芙渠

大將軍宴會被命作詩

六章

征西大將軍京陵王公會射堂皇太子

見命作此詩

六章

太尉王公以九錫命大將軍讓公將還

京邑祖餞贈此詩

六章

大安二年夏四月大將軍出祖王羊二

公於城南堂皇被命作此詩

六章

從事中郎張彥明爲中護軍

六章

贈汲郡太守

八章有序

贈顧驃騎二首

有皇

八章有引

思文

八章有引

贈鄱陽府君張仲膺

五章

贈顧彥先

五章

答顧秀才

五章

答大將軍祭酒顧令文

五章

答吳王上將顧處微

九章

贈顧尚書

答兄平原書

贈鄭曼季四首

谷風

五章有序

鳴鶴

四章有序

南衡

五章有序

高岡

四章

答孫顯世

十章

失題

八章

失題 六章

失題

失題

答兄平原

答張士然

爲顧彥先贈婦往返四首

附錄

本傳

陸清河集目錄終

陸清河集卷之一

晉吳郡陸雲著

明太倉張溥閱

賦

南征賦

有序

太安二年秋八月，奸臣羊玄之、皇甫商敢行稱亂，凌逼乘輿，天子蒙塵于外，自秋徂冬，大將軍敷命群后，同恤社稷，乃身統三軍，以謀國難，自義聲所及，四海之內，朔漠之表，蒸徒羸糧而請

奮胡馬欵塞而思征、四方之會衆以百萬、軍旅之盛、威靈之著、自古已來、未之有也、粵十月、軍次于朝歌、講武治戎、以觀兵于殷墟、於是美義征之舉、壯師徒之盛、乃作南征賦、以揚匡霸之勲云爾、

有皇晉之霸后、資濬哲之獻聖、崇文德於緝熙、濟武功而保定、應天鑒之昭華、荷帝祐之休命、步玉衡以觀八方、在璇璣而齊七政、芒芒神道、化洽崇深、仰戾天飛、俯洞淵沈、振南箕以鼓物、

冒慶雲而崇蔭、恢天維以籠世、廓宇宙而宅心、
濟博施之厚德、鑑希聲之大音、淵澤回而泣注、
豪彥萃而爲林、九服惟清、諸夏謐靜、肅慎回首、
沙漠引領、天和時降、地靈夙挺、結芳林之奇幹、
發珍禾之神穎、勵修德於億兆、端澄形於萬景、
在中葉之不競、遭皇家之毒亂、悲國步之未夷、
仰夙興而昧旦、括無方而大誥、集率土而貞觀、
致天屬於王畿、肅宵征而省難、爾乃建黃鉞之
靈威、樹戎輅之高蓋、伐隱天之雷鼓、振凌霄之

電施介夫揮戈而夙興、輕武總于而啓萬、振靈
韶之嘈嘈、飛旛旄之藹藹、虹旂泝風以委蛇、霓
旄蒙光而容裔、公徒十萬其會雲興、悠悠華戎、
時罔丕承、爾乃命屏翳以夕降、式飛廉以朝升、
塗蒙雨而復清、景帶天而光澄、陪武臣於雕軒、
列名僚於後乘、猛將起而虎嘯、商飈肅其來應、
士憑威而嚮駭、馬獻天而景凌、臨川屯於廣陸、
武騎被乎中陵、類禡比京、師徒經始、桓桓先征、
在河之涘、順彼長道、懸旌千里、羨王師之遵時、

茂七德而發止、爾乃稅駕殷墟、我徒旣閑、順時
講武、薄狩于原、紛同方而類聚、煥副翼而明分、
祇明刑以誓衆、習軍政於舊聞、儼山立以崇蒼、
粲烟駭而興紛、若冥海之引回流、岱靈之吐行
雲、于時玄冬首時、陰風戒煞、山澤含哀、天地肅
乂、閒夜冽以澄清、中原曠而曖昧、戎士肅而咸
戒、三軍紛而雜遝、長角哀叫以命旅、金鼓隱訇
而啓伐、景凌冥而四播、音乘雲而上逝、火烈具
舉、伐鼓淵淵、朱光俛而丹野、炎暉仰而絳天、曜

靈翕赫以增熾憤氣拂悅而凌煙狂飈起而妄
駭行雲藹而芊眠旌旆翻其猗靡驚嫫因而嬾
娟爾乃洪音雷動清聞尅廣凌雲發揮萬里振
響聲馮虛而天回烈駭空而地蕩映皎月而望
舒闇照重昏而大夜朗服縣炎揚而晃儵飛烽
戢煜而決滂乃有熊羆之旅虓闕之將雄聲泉
涌逸氣風亮超三軍以奔厲賈餘勇而成壯兆
洪音於寂漠先無形而高唱紛若屯雲渙若積
波遁陰匿景靜言勿譁絕倡寂其旣收萬夫翕

而咸和、嚴鼓隱而重戒、景燧暕而星羅烈、蒙陰而仰假、曜憑陽而登遐、若扶桑之振華葉、皓天之散朝霞、超燭龍之絕景、豈比象於百華、

登臺賦

有序

永靈中參大府之佐於鄴都、以時事巡行鄴宮、三臺登高有感、因以言崇替、廼作賦云、

承后皇之嘉惠、今翼聖宰之威靈、肅言詞而述業、今乃啓行乎北京、巡華室以周流、今登崇臺而上征、攀凌坻而遂躋、今迄雲閣而少甯、爾乃

陸清河集

卷一

具

四

伫眄瑤軒、滿目綺寮、中原方華、綠葉振翹、嘉生
民之亶亶兮、望天晷之苕苕、厯玉階而容與兮、
憩蘭堂以逍遙、蒙紫庭之芳塵兮、駭洞房之迴
飈、頽嚮逝而迂物兮、傾冠舉而凌霄、曲房榮而
窈眇兮、長廊邈而蕭條、於是迴路透夷、邃宇玄
茫、深堂百室、層臺千房、闢南牕而蒙暑兮、啓朔
牖而履霜、遊陽堂而冬溫兮、步陰房而夏涼、萬
禽委蛇於潛室兮、驚風矯翼而來翔、紛譎譎於
有象兮、邈悠忽而無方、于時南征司火、朱明鬱

遂縣車式徐、曜靈西墜、暑乘陰而增炎兮、景望
淵而曖昧、玩瓊宇而情歔兮、覽八方而思銳、陋
雨館之常規兮、鄙鳴鵠之蔽芾、仰凌眄於天庭
兮、俛旁觀乎萬類、北溟浩以揚波兮、青林煥其
興蔚、扶桑細於毫末兮、崑崙卑乎覆簣、於是忽
焉俛仰、天地旣翕、宇宙同區、萬物爲一、原千變
之常鈞兮、齊億載於今日、彼區中之側陋兮、非
吾黨之一室、本達觀於無形兮、今何求而有質、
於是聊樂近遊、薄言儻佯、朝登金虎、夕步文昌、

綺䟽列於東序、朱戶立乎西廂、經蕤暉以披藻
兮、椒塗馥而遺芳、感舊物之咸存兮、悲昔人之
云亡、憑虛檻而遠想兮、審歷命於斯堂、於是精
疲遊倦、白日藏輝、鄙春登之有情兮、惡荆臺之
忘歸、聊弭節而駕言兮、悵將逝而徘徊、感崇替
之靡常兮、悟廢興而永懷、隆期啓而雲升、逝運
靡其如頽、長發惟祥、天鑒在晉、肅有命而龍飛
兮、跚重斯而肇建、嘉有魏之欽若兮、鑒靈符而
告禪、清文昌之離宮兮、虛紫微而爲獻、委普天

之光宅兮、質率土之黎彥、欽哉皇之承天兮、集
北顧於乃眷、誕洪祚之遠期兮、則斯年於有萬、

愁霖賦

有序

永甯三年夏六月鄴都大霖、旬有奇日、稼穡沉
湮、生民愁瘁、時文雅之士、煥然並作、同僚見命、
乃作賦曰

在朱明之季月兮、反極陽於重陰、興介邱之膚
寸兮、墜崩雲而洪沉、谷風扇而攸遂兮、苦雨播
而成淫、天決漭以懷慘兮、民嘖蹙而愁霖、於是

天地發揮、陰陽交烈、萬物混而同波兮、玄黃浩
其無質、雷憑虛以振庭兮、電凌牖而輝室、雷鼎
沸以駿奔兮、潦風驅而競疾、豈南山之暴濟兮、
將冥海之颯溢、隱隱填填、若降自天、高岸渙其
無涯兮、平原蕩而爲淵、遵渚回於凌河兮、黍稷
什於中田、匱多稼於億廩兮、虛風敬於祈年、外
薄郊甸、內荒都城、陰無晞景、雷無輟聲、纖波靡
於前途兮、微津隔於峻庭、紛雲擾而霧塞兮、漫
天頽而地盈、於是愁音比屋、歎發屢省、陽堂乏

暉朗室無景、望層雲之萬仞兮、想白日之寸脛、
感虛無而思深兮、對寂漠而言靖、毒甚雨之未
晞兮、悲夏日之方永、瞻大辰以頽息兮、仰天衢
而引領、愁情沈疾、明發哀吟、永言有懷、感物傷
心、結南枝之舊思兮、詠莊舄之遺音、羨弁彼之
歸飛兮、寄予思乎江陰、溷天末以流目兮、涕潺
湲而沾襟、何人生之倏忽、痛存亡之無期、方千
歲於天壤兮、吾固已陋夫靈龜、矧百年之促節
兮、又莫登乎期頤、哀戚容之易感兮、悲懽顏之

難傷考傷懷於衆苦兮愁豈霖之足悲雲曇曇
而疊結兮雨淫淫而未散晞朱陽於崇朝兮悲
此日之屢晏効豐隆於岳陽兮執赤松於神館
命雲師以藏用兮繼乘龍於河漢照濛汜之清
暉兮炳扶桑之始旦考幽明於人神兮妙萬物
以達觀

喜霽賦

有序

余旣作愁霖賦雨亦霽昔魏之文士又作喜霽
賦聊廁作者之末而作是賦焉

毒霖雨之掩時兮、情懷憤而無懌、肅有禱於人
謀兮、反極陰于天律、靖屏翳之洪隧兮、戢太山
之觸石、凌風絕而謐甯兮、歸雲反而揮霍、改望
舒之離畢兮、曜六龍於紫閣、揚天步之剡剡兮、
播靈輝之赫奕、於是朱明自皓、凱風來南、復火
正之舊司兮、黜后土於重陰、夷中原之多潦兮、
反高岸於蒿岑、萎禾竦而振穎兮、偃水豎而成
林、嘉大田之未墜兮、幸神祇之有歆、爾乃俯順
習坎、仰熾重離、兼明暢而天地曄兮、羣生悅而

萬物齊、魚凌淵以增躍兮、鳥望林而朝濟、戢流
波於桂水兮、起芳塵於沉沉、朱光播於甕牖兮、
素景衍乎中閨、天監作照、幽明畢覲、普厥有懽、
草及四國、翕萬情而咸喜兮、雖無獲而自得、災
未及害、和斯有祥、翼翼黍稷、油油稻糧、望有年
於自古兮、晞隆周之萬箱、原思悅於蓬戶兮、孤
竹欣於首陽、陰陽交泰、萬物方遒、炎神送暑、素
靈迎秋、四時逝而代謝兮、大火忽其西流、年冉
冉其易頽兮、時靡靡而難留、嗟沉哀之愁思兮、

瞻日月而增憂、感年華之行暮兮、思乘煙而遠
遊、命海若以量津兮、吾欲往乎瀛洲、臨儀天之
大川兮、凌懷山之洪波、瞻增城之峻極兮、仰蓬
萊之嵬嶷、望王母於弱水兮、詠白雲之清歌、雖
嘉命之未錫兮、將輕舉於流沙、振仙車之鳴鸞
兮、吐玉衡之八和、託芝蓋之後乘兮、食瓊林之
朝華、修無窮以容與兮、豈萬載之足多、

歲暮賦

余祇役京邑、載離永久、永甯二年春、忝寵北郡、

其夏又轉大將軍右司馬於鄴都自去故鄉荏苒六年惟姑與姊仍見背棄銜痛萬里哀思傷毒而日月逝速歲聿云暮感萬物之旣改瞻天地而傷懷乃作賦以言情焉

夫何乾行之變通兮昏明迭而載路
羨飛轡之遠御兮騰六龍於天步
時赴節而漸流兮氣移數而改度
揮促節於短日兮振修策於長夜
運悠忽其旣周兮歲冉冉而告暮
變棘心之柔風兮滋豐草之湛露
玄暉邈以峻服兮黃裳皓而

振素於是顓頊御時、玄冥統官、天廟旣底、日月
貞觀、淪重陽於潛戶兮、嚴積陰於司寒、日回天
以滅景兮、颼衝淵而無瀾、堅冰涸於川底兮、白
雪隕於雲端、普區宇之瘁景兮、頻萬物之衰顏、
時凜戾其可悲兮、氣蕭索而傷心、淒風愴其鳴
條兮、落葉翻而灑林、獸藏邱而絕迹兮、鳥攀木
而栖音、山振枯於層嶺兮、民懷慘於重襟、寒與
暑其代謝兮、年冉冉其將老、豐顏暱而朝榮兮、
玄髮粲其夕皓、感芳華之志學兮、悲時暮而難

考遠圖逝而辭懷兮、密思集而盈抱、羨厚德之
溥載兮、嘉豐化之大造、恨盛來之苦晏兮、悲哀
至之常蚤、指晞露而怵心兮、衍死生於靡草、蒙
時來之嘉運兮、遊上京而凱入、委乘輅於紫宮
兮、剖金虎而底邑、憑台光之發暉兮、荷寵靈而
來集、望故疇之迥遼兮、泝南風而頽泣、長歎息
而永懷兮、感逝物而傷悲、哀年歲之攸往兮、伊
行人之思歸、結隆思於朝日兮、綴永念於汜暉
表寸陰而貞吝兮、盼盈尺其若遺、嗟我行之久

永兮何歸途之芒芒、遵渚兮盼川、攸逝兮江湘、
處孝敬於神邱兮、結祇慕於惟桑、瞻山川而物
存兮、思六親而人亡、問仁姑而背世兮、及伯姊
而淪喪、尋餘蹤於空宇兮、想絕景於遺堂、悲山
林之杳藹兮、痛華構之邱荒、靖深情以遐慕兮、
思纏綿而懷楚、涕垂頤以交頽兮、哀凌心而洞
駭、神尋路而窘逝兮、形顚蹙乎其所、心悠悠其
若懸兮、音旣絕而復舉、悲人生之有終兮、何天
造而罔極、仰悲谷之方中兮、顧懸車而日昃、百

年迅於分噓兮，千歲疾於一息。誅大椿之萬祀兮，同蟪蛄於未識。歲難停而易逝兮，情艱多而泰寡。年有來而棄子兮，時無算而非我。祇生心於日順兮，雖呼翕其難假。攝貳生於逆旅兮，欲淹留其焉可。彼監寐之有時兮，亦始卒之固然。舒遠懷於千載兮，悵同感乎中山。鑒通人之惘戒兮，懼晏平之達言。啓貞心以自責兮，覽遺籍而問道。亮爽鳩之旣徂兮，故營邱之有紹。在吾儕之陋心兮，豈取樂於東表。苟長生而自得兮，

將奚待而有天考大德於天地兮知斯言之益矯

逸民賦

有序

富與貴人之所欲也而古之逸民或輕天下細萬物而欲專一邱之歡擅一壑之美豈不以身勝於宇宙而心恬於紛華者哉故天地不易其樂萬物不干其心然後可以鈔有生之極享無彊之休也乃爲賦云

世有逸民兮栖遲於一邱委天形之外心兮淡

浩然其何求、陋此世之險隘兮、又安足以盤遊、
杖短策而遂往兮、乃枕石而漱流、載營抱魄、懷
元服、一傲物思甯、妙世自逸、靜芬響於永言、滅
絕景於無質、相荒土而卜居、度山河而考室、曾
邱蓊蒼、穹谷重深、叢木振穎、葛藟垂陰、潛魚泳
沚、嚶鳥來吟、仍蔬圃於芝薄兮、卽蘭堂於芳林、
靡炎飈以赴節兮、揮天籟而興音、假樂器於神
造兮、詠幽人於鳴琴、挹廻源於別沼兮、食秋菊
於高岑、蒙玉泉以濯髮兮、臨濬谷而投簪、寂然

尸居儼焉山立、遵渚龍見、在林鳳戢、遁綿野以
宅心、望空巖而凱入、明發悟歌、有懷在昔、賓濮
水之清淵兮、儀礚溪之一壑、毒萬物之誼譁兮、
聊漁釣於此澤、爾乃薄言容與、式宴盤桓、朝挹
芳露、夕玩幽蘭、恥區外而放志兮、眷天路而怡
顏、望靈嶽之清景兮、想佳人於雲端、悲滄浪之
濁波兮、詠芳池之清瀾、鄙終南之辱節兮、躋伯
陽之考槃、眄清霄以寄傲兮、泝凌風而頽歎、玄
微載晏、何思何欲、漂若行雲之浮、泊若窮林之

木、容有得之必喪兮、蓋怙寵之召辱、彼貪夫之
死權兮、固遺生以要祿、竦戰兢而履冰兮、祇肅
懷以臨谷、亮據鼎之無慄兮、在顛沛其必渥、是
故夫形魂者徵咎、體壯者爲犧、雖明文而龍藻
兮、終俛首而受羈、立修名於禍始兮、登全生於
戾階、資朝華之促節兮、抱千載之長懷、擠考終
於遠期兮、顛靈根而自摧、殉有喪之假樂兮、彼
無身其孰哀、美達人之玄覽兮、邈藏器於無爲、
物有自遺、道無不可、萬殊有同、齊物無寡、並家

於國等朝于野、榮在世而貴身兮、神居形而忘
我、欽、竅古之達言兮、信懷莊而悅賈、曾、旣明於
天爵兮、何、悒、悲於人禍、陋國風之皇恤、同明哲、
於大雅、亂曰、乘白駒兮、皎皎、遊穹谷兮、藹藹、尋
峻路兮、崢嶸、臨芳水兮、悠裔、槃邱園兮、暇豫、翳
翠葉兮、重葢、瞻洪崖兮、清輝、紛容與兮、雲際、欲
凌霄兮、從之、恨窮天兮、未泰、詠歡友兮、清唱、和
爾音兮、此世、

羊腸轉賦

爾乃使熊羆之士、虓鬪之將、雄聲泉湧、逸氣風
亮、超三軍以奔厲、賈餘勇以成壯、兆洪音於寂
寞、先元聲而高唱、元兵時紛若屯雲、煥若積波、
授教斯謐、靜言勿譁、嚴鼓隱其雲、戒萬夫翕而
咸和、治安步以止立、應金奏而靡戈、進總干以
乘言、退揮旅而星羅、及至景凌禮旣畢、歸旅將
振、尋縈圓轉、因瀨蓋旋、若疾流之繞駿、沈驚飈
之靡狂、塵羊腸轉、時命屏翳以夕降、式飛廉而
朝興、涂蒙雨而後清、景帶天而先澄、陪俊臣於

彫輅列名僚於後乘、猛將起而虎嘯、商風肅其來應、士憑勢而響駭、馬噓天而景凌、

舊本混列與兄平原

書中今
摘出

寒蟬賦

有序

昔人稱雞有五德、而作者賦焉、至於寒蟬、才齊其美、獨未之思、而莫斯述、夫頭上有綏、則其文也、含氣飲露、則其清也、黍稷不食、則其廉也、處不巢居、則其儉也、應侯守節、則其信也、加以冠冕、則其容也、君子則其操、可以事君、可以立身、

豈非至德之蟲哉。且攀木寒鳴，負才所歎。余昔
僑處，切有感焉。興賦云爾。

伊寒蟬之感運，近嘉時以遊征，含二儀之和氣，
稟乾元之清靈，體真精之淑質，吐爭噬之哀聲。
希慶雲以優遊，遁太陰以自寧。於是靈岳幽峻，
長林參差，爰蟬集止，輕羽莎佗，清徹微激，德音
孔嘉，承南風而軒景，附高松之上華，黍稷惟馨，
而匪享，竦身晞陽乎靈和，唳乎其音，翩乎其翔，
容麗蜩蟬，聲美宮商，飄如飛鳥之遺驚，風眈如

輕雲之麗太陽、華靈鳳之羽儀、睹皇都乎上京、
跨天路於萬里、豈蒼蠅之尋常、爾乃振修綏以
表首、舒輕翅而迅翰、挹朝華之隆露、含煙煨以
夕餐、望北林以鸞飛、集樛木以龍蟠、彰淵信於
嚴時、稟清誠乎自然、翩取微妙、綿蠻其形、翔林
附木、一枝不盈、豈黃鳥之敢希、唯鴻毛其猶輕、
憑綠葉之餘光、景秋華之方零、思鳳居以翹竦、
仰竚立而哀鳴、若夫歲聿云暮、上天其涼、感運
悲聲、貧士含傷、或歌我行永久、或詠之子無裳、

原思嘆於蓬室、孤竹吟於首陽、不銜子以穢身、
不勤身以營巢、志高於鳴鳩、節竝乎鴟鴞、附枯
枝以永處、倚瓊林之迥條、惟雨雪之霏霏、哀北
風之颼颼、旣乃彫以金采、圖我嘉容、珍景曜爛、
晞曄華豐、竒侔黼黻、艷比袞龍、清和明潔、群動
希蹤、爾乃綴以立冕、增成首飾、纓黹翩紛、九旒
容翼、映華蟲於朱袞、表馨香乎明德、於是公侯
常伯、乃紆紫韞、執龍淵、俯鳴佩玉、仰撫貂蟬、飾
黃廬之多士、光帝皇之侍人、旣騰儀像於雲閨、

望景曜乎通天、邁休聲之五德、豈鳴鷄之獨珍、
聊振思於翰藻、聞令問以長存、於是貧居之士、
喟爾相與而俱嘆曰、寒蟬哀鳴、其聲也悲、四時
云暮、臨河徘徊、感北門之憂殷、嘆卒歲之無衣、
望泰清之巍峩、思希光而無階、簡嘉蹤於皇心、
冠神景乎紫微、詠清風以慷慨、發哀歌以慰懷、

陸清河集

卷一

十七

啓疏

諫吳王起西園第宜遵節儉啓

郎中令臣雲言、伏見西園大營第室、雖未審節
度豐儉之制、然用工甚嚴、竊懼事不得濟、愚臣
管見、輒敢瞽言、臣竊見世祖武皇帝臨朝淵默
訓世以儉、卽位二十有六載、宮室臺榭無所新
營、屢發明詔、厚戒豐奢、國家纂承、務在遵奉、而
世俗陵遲、家競盈溢、漸漬波蕩、遂已成風、雖嚴
詔屢宣、而侈俗滋廣、每觀詔書、衆庶歎息、清河

王昔起墓宅。未及極偉。時手詔追述先帝節儉之教。懇切之旨。形于四海。清河王毀壞成宅。以奉詔命。海內聽望。咸用欣然。臣慮以先帝遺教。日以凌替。聖上憂勤。猶未之振。今與國家協崇大化。追闡前蹤者。實在殿下。先敦素朴。而後可以訓正四方。示民知禁。竊謂第室之設。可使儉而不陋。凡在崇麗。一宜節之以制。然後上厭帝心。下允民望。且自閒制國之用。事從節省。而方於此時。大造第宅。又非聖意從簡之旨。臣以允

才、殿下不以其驚闇、特蒙拔擢、將以臣能有狂
夫之言、可以裨補聖德、臣自奉職已來、亦思竭
忠効節、以報所受之施、是以不慮犯迕、敢陳所
懷、如愚、臣言有可采、乞垂三省、

又疏

臣雲言間一日敢獻瞽言以干聞聽、天恩未加
咎責、猥發明令、臣伏誦聖旨、奉用歎息、臣聞有
國者不患宮室之不崇、患在令名之不立、是以
賢人之在富貴、莫不卑身節欲、損已挹情、能保

其國家。令聞百世。厯觀古今。以約失之者實寡。以奢失之者蓋衆。非天下之至德。孰能居豐行儉。在富能貧。清儉節素。自殿下家道。此所以懷集四方。而使兆民服者也。世祖武皇帝富有四海。貴爲天子。居無離宮之館。身御家人之服。先帝豈欲以此道止於治身而已者哉。固將必欲遺訓百世。貽燕子孫。此固殿下所宜祇奉也。昔淮南太妃當安厝。臣兄比下墨機。時爲郎中令。從行太妃。令追稱先帝。養生送終。事從節儉。今

宜奉用遺制、不事豐厚、令旨懇切、言歸于約、清河昔起墓宅、發手詔又還毀、朝野之論、于今未已、竊以西園第宅、用功方嚴、雖知聖德節儉有素、猶復思關愚言、以補萬一、亦臣縋綖微忠、昊天罔極之誠也。至被明令、聖旨炳然、嘉承至道、奉以稱慶、不勝下情、謹疏以聞。

諫吳王起觀疏

郎中令臣雲言、前啓西園第宅、宜遵先帝節儉之制、不宜使至豐麗、被命優隆、言歸謙素、臣奉

以欣憲、而聞屋宇之制、旣自崇侈、竊聞當復起
觀六間旣非前令之旨、且臣亦竊用不安、臣聞
詩云、昊天有成命、二后受之、成王不敢康、今四
祖創基、旣垂成命、哲王繼體、世祖恭儉、毀下承
之、固宜奉不甯而自昔造第過度、民歎其勞瘁、
士譏其過尤、謗言未弭而又加以崇侈、此誠不
可、不惜先帝背世、曾未十年、而儉德之亡、國爲
其首、此又所以慷慨酸心、而不敢不盡狂夫之
諫者也、按晉魏以來、諸侯奢靡、第室滋廣、未有

如國今日之甚者也。古人之戒。猶云無爲福始。况今猶崇豐侈。作爲禍先。此又臣所以寤寐憂歎。忘寢與食者也。殿下誕應運期。首建大國。固將憲章令典。貽範萬世。始基之制。不可不慎。今設爲豐奢。以示將來。子孫象之。又何以能國。且先帝勤家。如彼其素。殿下承之。若此其泰。進傷奉國之典。退虧隆家之業。用之當身。損盛德之譽。垂之後嗣。非興邦之制。一舉而失四得。此古人之所以長太息者也。且第宅之過。朝野所譏。

而監司結舌。莫敢明言者。實以殿下國之昵親。朝所欽重。故隱司過之鋒。結執憲之繩耳。後世直臣。必將信威明法。考制度禮。愚以此觀有必毀之理。苟此物不可終然。誠不如不爲。使其無毀也。今空設過制之物。而終爲直士之資。臣又未見其可也。惟殿下思愚臣之言。時命有司。必省此舉。舉手權還。伏用流汗。

請吳王引師友文學觀書問道啓

郎中令臣雲言。聞古之君子。旣盛德在身。又外

求諸物。是以廣納俊士。博觀載籍。朝夕師傅。夙
夜勤禮。賓友嘉客。講義於前。往古來今。日聞于
耳。故知積德廣而流芳罔極。伏惟殿下天資聰
獻。應期挺秀。聖敬敷聞。輝光日新。卽位已來。仍
遭不造。大禮雖闕。哀故茲有。賓客無接。覲之宴。
師友闕講誦之禮。愚臣所以寤寐永歎。而私懷
慷慨者也。愚以宜發通客之令。使朝士有接見
之緣。又可時與師友文學。披觀文籍。坐而論道。
非學無以聞義。非士無以行禮。禮義旣舉。羣望

允塞。此臣下所以拭目思德音之發者也。臣區區所懷敢以聞。

又啓

臣雲言臣前啓可與師友文學觀書論道。今又天時清適，正是講誦之日。臣聞崇山之高，不厭其峻；滄海之量，無限於廣。是以周公一日萬事，猶復旁觀百篇。孔子假期玩年。至於韋編三絕。由是言之，雖聖之弘，亦不能不求之於學也。伏惟殿下明德光劭，天資秀朗，方當光演文武，允

廸皇猷、如復垂精、古今之與、仰覽千載之籍、則
神道叡知、無物不照、且師友文學、朝選於衆、以
德來教、雖豐祿崇禮、已隆其人、而先王之道、未
簡聖聽、在位累載、官廢其職、每聽其言、亦懷慄
慨。臣以可於良日、就講經學、先闡大道、永播芳
風、愚臣區區、敢獻瞽言、

請吳王入朝啓

郎中令臣雲言、殿下自卽第日來、旣仍多哀、故
聖體亦恒不安、和自不朝、見二宮、已經年載、前

既比造趙軹、近又自表出城、至五日問訊、輒以疾聞、臣切所未安、愚以此五日輿駕宜入朝、臣聞事君之道、苟在盡規、知無不爲、是以愚臣敢獻瞽言、

請吳王覆校諸官啓

郎中令臣雲言、伏見令書以部曲將李咸、馮南司馬吳定、給事徐泰等覆校諸官市買錢帛簿率日決、咸南等治書以下、無所復司、而察錢帛重寶、奸吏多情、出入之用、誠宜使虛實當法、以

防檢巧僞。然臣愚以聖德龍興，光有大國，選衆官材，庶工肄業。臣以虛薄，忝竊朝右，雖質弱任重，無益補察。至於奉已思勤，昊天罔極，中尉該大農誕，皆清德淑慎，恪居所司，其下衆官，悉州閭一介，䟽闇之咎，雖可日聞。至於處義用情，庶無大戾。今咸南軍旅小人，定泰士卒，廝賤非有清慎素著，忠公足稱。今猥使此等任以覆校，大。臣所關，猶謂未詳。咸等督察，然後得信。旣非開國勿用之義，又傷殿下推誠納下，曠蕩之量。雖

使咸等能盡節益國而功利百倍。至於光輔國
美猶未若開懷信士之無失。况咸等所益不過
姑息之利。而名使小人用事。大道凌替。此臣所
以慷慨也。亂之所興。在於小人得親。治之所廢。
在於君子自替。廢興治亂。由此而已。臣備位大
臣。職在獻可。苟有管見。敢不盡規。愚以宜發明
令。必罷此等。覆察衆士。一付治書。則無外之度。
光照遠。大信臨下。人思盡節矣。謹隨啓以聞。
請防不法啓

郎中令臣雲言國人兵放橫多行非法至使暴
及市道聲聞京邑親信兵乃罵詈洛陽市丞遠
近囂然聲論日廣而主者前後所報每蒙寬宥
故羣小敢肆其暴虐前輿駕當東時臣具以奏
聞上立節度亦備嚴上下司察念在奉宣而親
信卒泰矯稱突關強市民物至使行道哀窮路
人歎惋臣下祇命幸使罪人時獲僉以泰宜加
重戮以戒肅方來軍都督李嬰行實奸穢然身
備王人雖不致法猶加捶楚主者奏泰依嬰決

罰事寢不出而特令原泰泰之凶狡罰至大辟
至於今日不蒙薄罰臣切以自今羣醜虎視競
爲暴虐矣小人得志則下凌上替前卿顯言事
大農文旨倨傲反成却安功名之士議在不辱
而顯等恃恩敢行侮慢臣時列啓并呈顯言事
寢不省是以自來拱嘿未敢多言切見國法日
侈而恩宥無已誠懼威禁遂頽醜聲滋聞愚謂
自今宜齊之以法使下知禁有司所執猶宜時
聽不然以往則監司之吏鋒鉅靡加而準繩替

矣。臣忝竊非據，與聞國事，服事以來，荏苒三年，朝憲多違，威御無列，好問不登，而流聲播越，皆由執政之臣。官非其人，常思收迹自替，以避賢路。退惟受遇徵報未効，是以忍垢素餐，敢用文諫。惟殿下哀明愚臣，繾綣愚臣，不以前後干迕，多見罪責，臨紙慷慨，言不自盡。

書

移太常府薦張瞻書

蓋聞在昔聖王承天御世、殷薦明德、思和人神、
莫不崇典謨以教思、興禮學以陶遠、是以帝堯
昭煥、而道協人天、西伯質文、而周隆二代、大晉
建皇業、配天地、區夏旣混、禮樂將庸、君侯應歷
運之會、贊天人之期、博延俊茂、熙隆載典、伏見
衛將軍舍人同郡張瞻、茂德清粹、器慮深通、初
慕聖門、棲心重仞、啓塗及階、遂升樞輿、抽靈匱

於祕宮、披金滕於立夏、思樂百氏、博採其珍、辭
邁翰林、言敷其藻、探微集逸、思心洞神、論道屬
書、篇章光覲、含奇宰府、婆娑公門、棲靜隱寶、淪
虛藏器、褰裳襲錦、褐衣被玉、曾泉改路、懸車將
邁、考槃下位、歲聿屢遷、縉紳之士、具懷佩恨、方
今太清闢宇、四門啓籥、立綱括地、天網廣羅、慶
雲興以招龍、和風起而儀鳳、誠巖穴耀穎之秋、
河津託乘之日也、而瞻沈淪下位、羣望悼心、若
得端委太學、錯綜先典、垂纓玉階、論道紫宮、誠

帝室之瑰寶、清廟之偉器、廣樂九奏、必登昊天
之庭、韶夏六變、必饗上帝之祀矣、

答車茂安書

雲白前書未報、重得來况、知賢甥石季甫當屈
鄮令、尊堂憂灼、賢姊涕泣、上下愁勞、舉家慘戚、
何可爾耶、輒爲足下具說鄮縣土地之快、非徒
浮言華豔而已、皆有實徵也、縣去郡治、不出三
日、直東而出水陸並通、西有大湖、廣縱千頃、北
有各山、南有林澤、東臨巨海、往往無涯、汜船長

驅一舉千里。北接青徐。東洞交廣。海物惟錯。不可稱名。遏長川以爲陂。燔茂草以爲田。火耕水種。不煩人力。決泄任意。高下在心。舉鎡成雲。下鎡成雨。旣浸旣潤。隨時代序也。官無逋滯之穀。民無飢乏之慮。衣食常充。倉庫恒實。榮辱旣明。禮節甚備。爲君甚簡。爲民亦易。季冬之月。牧旣畢。嚴霜隕而蒹葭萎。林鳥祭而尉羅設。因民所欲。順時游獵。結罝繞堙。密罔彌山。放鷹走犬。弓弩亂發。鳥不得飛。獸不得逸。真光赫之觀。盤

戲之至樂也。若乃斷遑海浦，隔截曲隈，隨潮進退，采蚌捕魚，鱸鮓赤尾，鋸齒比目，不可紀名。鱠鰕炙蟹，鯊魚烝石首，臠鯨鯨，真東海之俊味。肴膳之至妙也。及其蚌蛤之屬，目所希見，耳所不聞，品類數百，難可盡言也。昔秦始皇至尊至貴，前臨終南，退燕阿房，離宮別館，隨意所居。沈綸涇渭，飲馬昆明。四方奇麗，天下珍玩，無所不有，猶以不如吳會也。鄉東觀滄海，遂御六軍，南巡狩，登稽嶽，刻文石，身在鄮縣三十餘日。夫以帝

王之尊。不憚爾行。季甫年少。受命牧民武城之
歌。足以興化。桑弧蓬矢。丈夫之志。經營四方。古
人所歎。何足憂乎。且彼吏民。恭謹篤慎。敬愛官
長。鞭朴不施。聲教風靡。漢吳以來。臨此縣者。無
不遷變。尊大人賢姊上下。當爲喜慶。歌舞相送。
勿爲慮也。足下急啓。喻寬慰具。說此意。吾不虛
言也。停及不一。一陸雲白

與戴季甫書

雲頓首頓首。惟夏始暑。願府館萬福。疾病處遠。

人信希少。情問闕替。中間曠年。瞻慕敬想。興言反側。隆敦比辱。慰誨銜抱。豐眷以增。愚迹不勝勤企。謹及君之書。不以備

隆敦上有脫誤

又

陸雲頓首頓首曠遠以來。忽踰年載。宗想輝蔭。引領惟慕。東歸之後。疾患增瘳。且道路悠遠。不值信便。久念自修。而經年不果。雖在伏枕。至於結心注望。實係光塵。累蒙誨命。舊眷惟新。執對之日。如或面展。長塗自替。聽誨末由。瞻企勤戀。

陸清江集
卷一
三
守以委重。表不具。今更繼情。

又

季鸞公世相係徂落。俊德茂業。邦家之彥。一朝
並逝。永爾淪沒。哀痛切裂。不能自勝。柰何柰何。
江南初平。人物失叙。當賴俊彥。彌縫其闕。加在
二賢。楚國之良。沈寶積實。未重大朝。重惟痛恨。
言增哀咽。誠念仁風篤烈。如在疇昔。意愛所隆。
嗟悼之心。誠不可言。備蒙其分情。兼切傷加。承
仁誨益。以惻愴。

又

武陵於荊州云多人士、聞周孟子伍令明潘世
長諸人、竝爲美德、心常依依、今日遭遇、良驥展
才之秋也、不審達者凡有幾人、無因聽承誨語、
咨稟未聞、每懷勤企、表不盡言、

又

長游前下、停此十餘日、想德欣喜、無以爲喻、分
別恨恨于今、戀之當暑、遠涉益追心懸、清粹沈
茂、思敏通微、居德履道、秉心真實、貴一時良彥

君之別久。見之懽察。風姿美令。心神烈暢。已成美器。欽愛之情。欵然至實。近聞若思。未有通塗。每用於邑。

又

周安東昔奄薨徂。追慕切剝。不能自勝。勲業弗究。早爾背世。遺惠鄙州。民物同哀。備記名義。情兼切裂。在此會同。每言高重武陵。至心欵列。誠念篤終。必垂悽愴。王季楊孝友行素。旣簡清塵。在此接近。備其所顧。居心秉尚。用志不苟。公私

操實足爲美器。今爲土斷品還此郡。前羣小虛妄。遂下其編牒。爲之憤歎。人物遠士。彝倫多失。願垂末光。益有以潤區區至心。謹復言意。載彥遠永昌。猶爲遠小。想其必有惠政耳。

又

郭敬言蒸陽良才遠負。爲之邑歎。以其姿望足以致高。想不久爾耳。石行文在無錫。大有清績。一州之高功。長吏此家行。素道實州閭所稱。疇昔接事。旣盡其才。願重榮益。以成其實。凡在羽

族思附鳳翼、風塵所集、無不拭目、

與張光祿書

長幼之序、人倫大司、季世多難、失敬在昔、敢希
令典、求思自邁、謹奏下敬、以藉虔款、

又

顧令文彥先、每宣隆眷、彌泰之惠、懷德惟慙、守
以反側、旣晞仁風、委心自昵、加與沛君分同骨
肉、憑藉之懷、凝心如結、

又

加蒙顧遇重以傾倒惟亮歸誠石行文敦素篤
邃道實茂淑器敏旣美思學又快南州良德今
者東行望風自託其意繼綰願厚接納副其乃
心

與朱光祿書

少長之禮教化所崇中葉陵遲舊章廢替追惟
前訓思遵在昔敢慕高義謹奏下敬

與嚴宛陵書

少長之序禮之大司晚節陵替舊章殘棄瞻言

令典既慕欽承、仰憑高風、實副邦民、謹奏下敬、
以藉虔款、思復未遠、庶免悔吝、

與楊彥明書

雲白、欽明去書不悉、彥先來得書、以爲慰、時去
荏苒、歲行復半、悲此推移、終然何及、漸已欲熱、
想自如常、悠悠守限、良談未日、眈然東望、思以
叙至、及反、憤罔不多行矣、愛德往來相聞、

又

雲白、省示累紙、重存往會、益以增歎、年時可喜、

何速之甚。昔年少時見五十公。去此甚遠。今日
冉冉已近之已耳。順之年。行復爲憂歎也。柯生
而多悅。樂春未厭。秋風行戒已。悲落葉矣。人道
多故。懽樂恒乏。遨遊此世。當復幾時。各爾永隔。
良會每闌。懷想親愛。寤寐無忘。書無所悉。

彥先來相欣喜。便復分別。恨恨不可言。階塗尚
否。通路今塞。令人惘然。名論允進。遠而有光者。
度此顯期。不淹民望耳。廟堂之士。比迹山棲者。
悲歎豈惟一人。少明湘公。亦不成遷。名公之舉。

且可以爲資。然今恨恨當行行復有宜耳。

又

彥先相說疾患漸欲增廢深爲怛然行向衰篤。疾來應百年之望。雖未必此爲疑。然親親所以相卹之一感耳。想勤服藥行復向佳耳。吾旣當羸間來體中亦恒少賴。日爾匆匆則堪自力。未遠待罪會期難尅。情之戀想何勞之多。好自愛。屢相聞。

又

行言竟行、令人恨之、已當至未耶、能少留不、世
明篤行至性如前後所論、語其偶爾、旋冀能悟
耳、而聞其遂遠、逝、真使愕然、甯以所不可、虧一
國之清格乎、輒便絕意、彥先所一二、

又

戴會稽如是便發、分別恨然、一時名士、惟當有
此君耳、失分重、少、令人歎息、善得日夕真家人、
若思望之清才俊類、一時之彥、善竝得接、九月
中可得達東禮、衡陽長沙甚快、東人近未復有

見叙者公進屈久恒爲邑罔黨方有清塗薄國
讓在內中大有好稱此家一時美德也在事又
佳甚快甚快

又

永耀已葬冥冥遠矣存想其人痛切肝懷奈何
奈何聞伯華善佳深慰存亡人生有終誰得免
此且使繼嗣克勝堂構有紹亦存亡之願也朋
類喪索同好日益如此生輩那可復多耶臨書
酸心

與陸典書

雲再拜。自曠但爾。已復經時。限制長路。惟親未
期。嗟近晨風。傾匡結言。來誨綢繆。篤眷彌隆。誦
玩千周。以當侍會。靜言莫瞻。翹翹仰慕。大人汜
愛。在我尤弘。每銜思戀。何時去心。限此省省。願
言用替。遙瞻靈邱。感時情傷。往來信理。自更繼
情。如有信。唯不玉音。

又

雲再拜。侍郎比侍數會。同邪。常憶戀此君。不慙

有、殞、此、君、公、私、竝、愴、年、長、而、志、新、齒、邁、而、曾、勤、
家、宗、美、者、也、常、感、其、篤、分、封、之、始、年、相、見、重、達、
其、至、心、

又

雲再拜日月運邁一何流速銜哀經變繫思念
深亡靈處彼黃塘幽曠在遠之憶心常愴裂含
痛靡及悠悠柰何想時時復一省視思至心破
無所屬情叔父一兄故尚未達想不久至耳深
憂徙際公私哀罔曠離山墓永適異國四時靈

寂。桑梓靡循。且念親各爾分析。情感復結。悲歎而已。知大人每垂卹逮也。臨表悲猥。絕筆餘哀。不知所次。雲再拜。

又

每念彥先情兼剝裂年盛志美令姿可惜舉言及此。不知心傷也。

又

雲再拜。國土之邦。實鍾俊哲。太伯清風。遯世立德。龍蛇東嶽。三讓天下。垂化邁迹。百代所睎。高

蹤越於先民。盛德稱乎在昔。續及延陵。繼響馳聲。沈淪漂流。優遊上國。聆音察微。智越衆俊。通幽暢遐。明同聖哲。言偃昭烈於孔堂。員武邁功於諸侯。自秀偉相承。明德繼踵。亦爲不少。吳國初祚。雄俊尤盛。今日雖衰。未皆下華夏也。來誨所及。遐邇同懷。重及二聖。下逮衆子。或生羗狄。或在邊域。勲美之隆。實如嘉誨。愚以東國之士。進無所立。退無所守。明裂眚苦。皆未如意。雲之鄙姿。志歸邱壟。華門閨窻之人。敢睎天望之冀。

至於紹季札之遐蹤。結鬲肝於中夏。光東州之
幽昧。流榮勲於朝野。所謂窺管以瞻天。緣木而
求魚也。重申不剋。雲再拜。

又

雲再拜。每惟大人挺自然之妙質。稟淵姿之弘
毅。克壯其烈。兼詠之道。希文尚武。潛居以娛其
志。靜處以育其神。遊步八素之林。逍遙德化之
囿。豈如某者。牽曳瓊瓊。世道通明。俊乂在官焉。
使晞世之寶。久隱岑嶮之山。逸景之迹。永繫幽

冥之坂方將車乘回輪束帛箋箋排金風於太
微跨天路以妙觀恢皇綱之大烈垂榮祚乎祖
宗此乃大人之所宜循非允夫之可企望也無
因親展書以言心心之所積萬不叙一雲再拜

又

雲再拜巨卿前行陵有小事惟以具聞事已大
了猶以爲願行欲取歸念別方至豫以愍然每
相見未嘗不以大人爲言想令仁士光令遠公
然兄弟屢數常存思想想令遠分好已爲綢固

彥恩復蒙誘掖耳，無因覲對，言不盡心，屢垂誨以慰遠思，雲再拜。

又

雲再拜。巨卿在臺，高譽洋溢，洛邑之內，無不欽敬。東南之貴寶，真不但會稽之篠簜也。每會常共歌詠，信無一面不歎吟也。想方周旋，攜手散今日之思耳。雲再拜。

又

雲再拜。輒宣來意，仲應此家，大自欽重。大人儻

已見其意耳、

又

雲再拜不知從事今在州得假歸耳想今來得
行有緣侍面耳每得令遠書感賴豐化言言歸
款來誨恤及亦爲無已情深欣如云在身年歲
及人名聞難集非賴師友何以自濟願敦惠助
爲之光輔巨仁在此華亭之望以大人爲宗主
宜令小大得分亦崇洪業也雲再拜

弔陳永長書

雲頓首頓首哀懷切怛賢弟永曜早喪俊德酷
痛甚痛奈何陸士龍頓首頓首

又

雲頓首頓首天災橫流禍害無常何圖永曜奄
忽遇此凶問卒至痛心摧剝奈何奈何想念篤
性哀悼切裂當可堪言無因展告望企鯁咽財
遣表唁悲猥不次雲頓首

又

永曜茂德遠量一時秀生竒蹤瑋寶灼爾凌羣

光國隆家、人士之望、冀其永年、遂播盛業、攜手
退遊、假樂此世、奈何一朝、獨先彫落、奄聞凶諱、
禍出不意、拊心痛楚、肝懷如割、奈何奈何、豈况
至性、何可爲心、臨書鯁塞、投筆傷情、

又

與永曜相得便結願好、契濶分愛、恩同至親、憑
烈三益、終始所願、中間離別、但爾累年、結想之
懷、夢寐仿佛、何圖忽爾、便成永隔、衷心慟楚、不
能自勝、痛當奈何、奈何、義在奔馳、牽役萬里、至

心不叙東望貴舍雨淚霑襟今遣吏并進薄祭
不得臨哀追增切裂幸損至念書重不知所言

又

永曜素自彊健了不知有此患險戲之災遂不
可救豈惟貴門獨喪重寶此賢之殞那家以瘁
情分異地痛心殊深已矣遠矣可復柰何追想
遺規不去心目悠悠無期哀至悲裂不知何言
可以言知酷楚而已

弔陳伯華書

大君遠資高數世之瑰瑋、當光裕大業、茂垂勲
名、柰何日朝、早爾喪墜、自聞凶諱、痛心割裂、追
惟哀摧、肝心破剝、痛當柰何、柰何、相念夙年奄
嬰哀艱、扳慕不及、當可爲心、牽役遠路、無因奔
馳、東望靈宇、五情哽咽、割切哀慕、書重感猥、不
次

又

昔與大君分義款篤、彌隆之愛、恩加兄弟、憑此
烈好、要以始卒、何圖大君、獨先早世、遠聞計問、

若喪四體，拊心慟楚，肝心如割，柰何柰何，豈况
至性，當何可言。今遣吏恭集薄祭，不得臨喪，以
叙悲苦，計往人到貴舍之日，揮涕而已。投筆歔
歔。

春節帖

三月十六日，雲白春節，餘不適，得示知足下平
安。爲思，面未知何由如何，信數之及卿。旣清遂
可之，經高言人歎之，當令征南取之也。

靜前記

書

與兄平原書

一日案行并視曹公器物牀薦席具寒夏被七枚介幘如吳幘平天冠遠遊冠具在嚴器方七八寸高四寸餘中無扇如吳小人嚴具牀刷臆處尚可識疏枇剔齒纖縆皆在拭目黃絮二在垢垢黑目淚所沾洿手衣臥籠挽蒲棋局書箱亦在奏案大小五枚書車又作岐案以卧視書扇如吳扇要扇亦在書箱想兄識彥高書箱甚

似之筆亦如吳筆、硯亦爾、書刀五枚、琉璃筆一
枚、所希聞。景初三年七月、劉婕妤折之、見此期
復使人悵然有感處、器物皆素、今送鄴宮大尺
間數前已白其總悵及望墓田處、是清河時臺
上諸奇變無方、常欲問曹公使賊得上臺、而公
但以變譎、因旋避之、若焚臺當云何、此公似亦
不能止文昌殿北有閣道去殿、文內中在東殿
東、便屬陳留王內、不可得見也。案魏武帝於漢
爲相、不得有婕
妤、又景初是魏明帝年、如此則文帝
物也、與曹公器玩同處、故致舛雜矣、

又

一日上三臺曹公藏石墨數十萬片云燒此消復可用然烟中人不知兄頗見之不今送二螺

又

此書舊誤接前二螺下作一篇今正之

省曹公遺事天下多意長才乃當爾作弊屋向百年于今正平夷塘乃不可得壞便以斧斫之耳爾定以知吏稱其職民安其業也

又

近日復案行曹公器物取其剔齒籤一箇今以

送兄

又

兄于道有古方泉其銘如此不審兄頗曾見此

書種稷不近因魯引以問祕書中謹啓

舊接今送一篇

篇疑兄上有脫誤

又

雲再拜前省皇甫士安高士傳復作逸民賦今復送之如欲報稱久不作文多不悅澤兄爲小潤色之可成佳物願必留思四言五言非所長

頗能作賦爲欲作十篇許小者以爲一分生於
愁思遂復文誨欲得雲論間在郡紛紛有所鈞
定言語流行斷絕欲更定之而了不可以思慮
今自好醜不可視想冬下體中佳能定之耳兄
文章已自行天下多少無所在且用思困人亦
不事復及以此自勞役間居恐復不能不願當
自消息謹啓

又

雲再拜祠堂頌已得省兄文不復稍論常佳然

了不見出語意。謂非兄文之休者。前後讀兄文。一再過。便上口語。省此文。雖未大精。然了無所識。然此文甚自難事。同又相似。益不古。皆新綺用此。已自爲洋洋耳。答少明詩。亦未爲妙。省之。如不悲苦。無惻然傷心。言今重複。精之一日。見正叔與兄讀古五言詩。此生歎息欲得之。謹啓。

又

雲再拜。二祖頌甚爲高偉。雲作雖時有一佳語。見兄作。又欲成貧儉家。無緣當致兄。此謙辭。又

雲亦復不以苟自退耳。然意故復謂之微多民
不輟歎一句。謂可省。武烈未得有吳說桓王之
事。而云建其孤。恐太祖不得爲桓王之孫。雲前
作此頌。及信以白兄作游仙詩。故自能劉氏頌
極佳。但無出言耳。二頌不減復過所望。如此已
欲解此公之半歲暮賦。甚欲成之。而不可自用
得此百數十字。今送不知於諸賦者。不罷少不
想少佳。成當送到洛。陳琳大荒甚極。自雲作必
過之。想終能自果耳。謹啓

二陸集並不見二祖
頌。劉氏頌游僊詩。惟

國朝詩集
卷一
吳
歲暮賦耳
所失多矣

又

雲再拜、兵真凶事、生來初不見習、頃觀之、正自
使人意惡、羊腸轉時極佳、問人皆不解、何以作
此轉、雖云欲相泄、恐此正自取好耳、說之不能
工、願兄試一說之、張義元答員淵之回流崑崙
吐河不體、正自似急水中山石間、是人謂回轉
者、但言之辭不工耳、不知此中語、於諸賦中

如何

又

頃日極匆匆病一十當出畧通日在馬上此不可諧又恐信不及兄今以因休祖致又力作無錫書極無賴甚不備具如是更白問于中

又

雲再拜省諸賦皆有高言絕典不可復言頃有事復不大快凡得再三視耳其未精倉卒未能爲之次第省述思賦深情至言實爲清妙恐故復未得爲兄賦之最兄文自爲雄非累日精拔卒不可得言文賦甚有辭綺語頗多文適多體

便欲不清。不審兄呼爾不詠德頌甚復盡美省之惻然。扇賦腹中愈首尾發頭一而不快。言烏云龍見如有不體。感逝賦愈前恐故當小。不然一至不復。臧漏賦可謂清工。兄頓作爾多文。而新奇乃爾。真令人怖不當復道作文。謹啓

又

雲再拜祠堂贊甚已盡美。不與昔同。既此不容多說。又皆一事。非兄亦不可得。見弔少明殊復勝前弔蔡君清妙不可言。漢功臣頌甚美。恐弔

蔡君故當爲最，使雲作文好，惡爲當又可成耳。至於定兄文，惟兄亦恕其無遺情而不自盡耳。丞相贊云：披結散紛辭，中原不清利。兄已自作銘，此但頌實事耳。亦謂可如兄意，直說事而已。右當復屬文於引，便當書前銘耳。謹啓。

又

雲再拜誨欲定吳書。雲昔嘗已商之兄，此真不朽事，恐不與十分好書同。是出千載事，兄作必自與昔人相去。辯亡則已，是過秦對事，求當可。

得耳、陳壽吳書、有魏賜九錫文、及分天下文、吳書不載。又有嚴陸諸君傳。今當寫送。兄體中佳者、可並思諸應作傳、及作引甚單、常欲引之、未得兄所作引甚好、雲方欲更作引述思賦、儻自竭厲然、雲意皆已盡、不知本復何言、方當積思、思有利鈍、如兄所賦、恐不可須、願兄且以示伯聲兄弟、

又

舊與前書合爲一篇、語意不貫、今折爲二、

前日觀習、先欲作講武賦、因欲遠言大體、欲獻

之大將軍才不便作大文得少許家語不知此
可出不故鈔以白兄若兄意謂此可成者欲試
成之大文難作庶可以爲關雎之見微謹啓

又

雲再拜往日論文先辭而後情尚潔而不取悅
澤嘗憶兄道張公父子論文實欲自得今日便
欲宗其言兄文章之高遠絕異不可復稱言然
猶皆欲微多但清新相接不以此爲病耳若復
令小省恐其妙欲不見可復稱極不審兄猶以

爲爾不茂曹碑皆自是蔡氏碑之上者。比視蔡氏數十碑殊多不及言。亦自清美。愚以無疑不存三祖贊不可聞。武帝贊如欲管管流澤有以常相稱美。如不史願更視之。小跛幾而悅奕爲盡理雲。今意視文乃好清省。欲無以尚意之。至此乃出自然。張公在者必罷。必復以此見調。不知九愍不多不當小減。九悲九愁連日鈔除所去甚多才本不精。正自極此願。兄小爲之定一字兩字出之便欲得遲望不言謹啓。

又

雲再拜仲宣文如兄言實得張公力如子桓書
亦自不乃重之兄詩多勝其思親耳登樓賦無
乃煩感邱其弔夷齊辭不爲偉兄二弔自美之
但其呵二子小工正當以此言爲高文耳文中
有於是爾乃於轉句誠佳然得不用之益快有
故不如無又於文句中自可不用之便少亦常
云四言轉句以四句爲佳往曾以兄七羨回煩
手而沈哀結上兩句爲孤今更視定自有不應

用時期當爾、復以爲不快、故前多有所去、喜霽
俯煩習均弔誠重離、此下重得如此語爲佳、思
不得其韵、願兄爲益之、謹啓、

又

雲再拜、嘗聞湯仲歎九歌、昔讀楚辭、意不大愛
之、頃日視之、實自清絕、滔滔故自是識者、古今
來爲如此種文、此爲宗矣、視九章時有善語、大
類是穢文、不難舉意、視九歌、便自歸謝絕、思兄
常欲其作詩文、獨未作此曹語、若消息小佳、願

兄可試作之、兄復不作者、恐此文獨單行千載、
間嘗謂此曹語不好、視九歌、正自可歎息、王褒
作九懷亦極佳、恐猶自繼、真立盛稱九辯、意甚
不愛、

又

雲再拜、頃得張公封禪事、平平耳、不及李氏其
文無比、恐非其所作、欲見此公劉氏世頌、有信
願付雲、頃又爲輔吳奮威作頌、欲愈前頌、然意
竝不以快、遣信當送九愍三賦、脫然謂可舉意

假彼頌便有怯處想無又間便可耳大類不便
作四言五言謹啓

又

雲再拜誨二賦佳久不復作文又不復視文章
都自無次第文章旣自可羨且解愁忘憂但作
之不工煩勞而棄力故久絕意耳在此悲思視
書不能解前作二篇後爲復欲有所作以慰小
思慮便大頓極不知何以乃爾前登城門意有
懷作登臺賦極未能成而崔君苗作之聊復成

前意不能令佳、而羸瘁累日、猶云愈前二賦、不
審兄平之云何、願小有損益、一字兩字、不敢望
多、音楚、願兄便定之、兄音與獻彥之屬、皆願仲
宣須賦、獻與服繁、張公語雲云、兄文故自楚、須
作文、爲思昔所識文、乃視兄作誄、又令結使說
音耳、兄所撰願且可付之、此有書者、更校善書
送信還望之、謹啓

又

雲再拜、疏成高作未得去、省登遐傳、因作登遐

頌須臾便成、視之復謂可行、今並送之、尚未定
刊、及此信、今更有何所損益、後八人了無事、合
會之、才得二篇耳、索度是淫鬼、無緣在此中、故
不可作頌愁邑、忽欲復作文、臨時輒自云佳小
久、報不能視、爲此故息意文、欲定前於用功夫
大小文隨了、爲以解愁作爾、今視所作、不謂乃
極、更不自信、恐年時間復捐棄之、徒自困苦爾
兄小加潤色、便欲可出、極不苦作文、但無新奇
而體力甚困瘁耳、謹索幼安在此、令之草、今佳

一弘不呼作工謹啓

又

雲再拜誨頌兄乃以爲佳甚以自慰文章當貴
經緯如謂後頌語如漂漂故謂如小勝耳九愍
如兄所誨亦殊過望雲意自謂當不如三賦情
難非體中所長欲徧周流雲意亦謂爲佳耳然
不云其愈於與漁父吾今多少有所定及所欲
去留欲爾今送本徃不審能勝故不意亦殊未
以爲了南去轉遠洛中匆匆少暇願兄勅所遣

留爲當爾可須來不佳思慮益處未能補所欲
去徹與察皆不與目韻思惟不能得願賜此一
字雲作文如兄所論兄過所望况乃敢當今兄
有張蔡之懷得此乃懷怖也謹啓

又

雲再拜誨歲暮如兄所誨雲意亦如前啓情言
深至述思自難希每憶常侍自論文爲當復自
力耳雲意呼發頭但當小不如復耳兄乃不好
者試當更思之所誨雲文所比愁霖喜霽之徒

實有可爾者登樓名高恐未可越爾楊四公黃
胡頌恐此不得見比聞兄此誨若有喜懼交集
祖德頌無大諫語耳然靡靡清工用辭緯澤亦
未易恐兄未熟視之耳兄文方當日多但文實
無貴於爲多多而如兄文者人不厭其多也屢
視諸故時文皆有恨文體成爾然新聲故自難
復過九悲多好語可耽詠但小不韻耳皆已行
天下天下人歸高如此亦可不復更耳兄作大
賦必好意精時故願兄作數大文近日視子安

賦亦對之歎息絕工矣兄誨又爾故自是高手
謹啓

又

雲再拜蔡氏所長惟銘頌耳銘之善者亦復數
篇其餘平平耳兄詩賦自與絕域不當稍與比
校張公昔亦云兄新聲多之不同也典當故爲
未及彥藏亦云爾又古今兄文所未得與校者
亦惟兄所道數都賦耳其餘雖有小勝負大都
自皆爲雄耳張公父子亦語雲兄文過子安子

安諸賦兄復不皆過其便可可不與供論雲謂
兄作二京必傳無疑久勸兄爲耳又思三都世
人已作是語觸類長之能事可見幽通賓戲之
徒自難作賓戲客語可爲耳答之甚未易東方
士所不得全其高名頗有答極謹啓

又

雲再拜誨九愍如所勅此自未定然雲意自謂
故當是近所作上近者意又謂其與漁父相見
以下盡篇爲佳謂兄必許此條而淵弦意呼作

脫可行耳。至兄惟以此爲快，不知雲論文，何以當與兄意作如此異。此是情文，但本少情而頗能作汜說耳。又見作九者，多不祖宗原意，而自作一家說。惟兄說與漁父相見，又不大委曲盡其意。雲以原流放，惟見此一人，當爲致其義，深自謂佳。願兄可試更視與漁父相見時語，亦無他異。附情而言，恐此故勝淵弦兄意，所謂不善願，疏勅其處緒，亦欲成之，令出意，莫更感如惡所在。以兄文，雲猶時有所能得言。雲前後所作

謹啓

又

雲再拜誨前二賦佳視之行已復不如初昔文
自無可成藏之甚密而爲復漏顯世欲爲益者
豈有謂之不善而不爲懷此不成意想兄已得
懷之耳有作文惟尚多而家多猪羊之徒作蟬
賦二千餘言既無藻偉體都自不似事文章實
自不當多古今之能爲新聲絕曲者無又過兄
兄徃日文雖多瑰鑠至於文體實不如今日間

在洛有所視已當報而比更隆以今意觀文見此真更以爲不盡善文熙云故日向人歎兄文人終來同殆以此爲病張公文無他異正自清省無煩長作文正爾自復佳兄文章已顯一世亦不足復多自困苦適欲白兄可因今清靜盡定昔日文但當鈎除差易爲功力誨已定敬長誅意當聞與兄合雲久絕意於文章由前日見敦之後而作文解愁聊復作數篇爲復欲有所爲以忘憂貧家佳物便欲盡但有錢穀復羞出

之而體中殊不可以思慮腹立滿背便熱亦誠
可悲間視大荒傳欲作大荒賦旣自難工又是
大賦恐交自困絕異往經比千墓悵然欲弔之
無又卽意又事業

闕

又

雲再拜張公箴誄自過五言詩耳但雲自不便
五言詩由已而言耳玄泰誄自不及士祚誄兄
丞相箴小多不如女史清約耳恐兄無緣思於
此意猶云何而兄乃有高論更復無意雲故曰

不作文而常少張公文今所作兄輒復云過之
得作此公輩便可斐然有所謝故自爲不及諸
碑箴輩甚極不足與校歌亦平平彼見人讚叙
者當與令伯論吳百官次第公卿名伯畧盡識
少交當具項作頌及吳事有愴然且公傳未成
諸人所作多不盡理兄作之公私並叙且又非
常業從雲兄來作之今畧已成甚復可惜事少
功夫亦易耳猶可得五十卷謹啓

梅禹金云彼見以下疑別

又

義高家事正當付令文耳，弟彥長昔作吳事云三十卷，可令欽求，謹啓。

又

雲再拜，吳書是大業，既可垂不朽，且非兄述此一國事，遂亦失兄，諸列人皆是名士，不知姚公足爲作傳，不可著儒林中耳，不大識唐子正事，愚謂常侍便可連於尚書傳下，書定自難，雲少作書，至今不能令成，日見其不易，前數卷爲時

有佳語近來意亦殊已莫莫猶當一定之恐不全此七卷無意復望增欲作文章六七紙卷十分可令皆如今所作輩爲復差徒爾文章誠不用多苟卷必佳便謂此爲足今見已向四卷比五十可得成但恐胷中成癩爾恐兄胷疾必述作人故計兄凡著此之自損胷中無緣不病作書猶差易讚叙亦復無幾年歲限之猶當小復謹啓

又

雲再拜一日會公大欽欣命坐者皆賦諸詩了
不作備此日又病極得思惟立草復不爲乃倉
卒退還猶復多少有所定猶不副意與頌雖同
體然佳不如頌不解此意可以不弘遠去當祖
道似當復作詩搆作此一篇至積思復欲不如
前倉卒時不知爲可存錄不諸詩未出別寫送
弘遠詩極佳中靜作亦佳張魏郡作急就詩公
甚笑燕王亦似不復祖道弘遠已作爲存耳兄
園葵詩清工然猶復非兄詩妙者雲詩亦惟爲

陳清江集 卷一
彼一語如佳先已先得便自委頓欲更作之昔
如已身先此篇詩了不復徬彿識有此語此語
於常言爲佳謹啓

又

雲再拜久不復作文了無復次第真立昔屢聞
周侯至論前比霖雨此下人亦作愁霖賦好醜
見敦又因人見督自愁慘又了無復意此家勤
勤難違之亦復毒此雨憂邑聊作之因以言哀
思又作喜霽今送雲作爲易得耳窮不好故都

絕意此間人呼作者皆休故不得有所送不審此何成已出之故爲存不棄耳謹啓

又

雲再拜一日視伯喈祖德頌亦以述作宜褒揚祖考爲先聊復作此頌今送之願兄爲損益之欲令省而正自輒多欲無可如省碑文通大悅愉有似賦愚謂小復質之爲佳前作此頌書之行欲遣信以白兄昨聞有賊消息愁憤無賴旣冀又然又已成書聊以付信耳尋得李寵勸封

禪草信自有才頗多煩長耳令送間人又有張
公所作已令寫別送臨紙罔罔不知所言謹啓

又

近得洛消息滕永適去二十日書彥先訪爲驃
騎司馬又云似未成已訪難解耳敬屬司馬叅
軍此間復失之恨不得與周旋戴允治見訪大
司馬謹啓

又

雲再拜君苗文天才中亦少爾然自復能作文

雲惟見其登臺賦及詩頌作愁霖賦極佳頗倣
雲雲所如多恐故當在二人後然未究見其文
見兄文輒云欲燒筆硯以爲此故不喜出之曹
志苗之婦公其婦及兒皆能作文頃借其釋詢
二十七卷當欲百餘紙寫之不知兄盡有不李
氏云雪與列韻曹便復不用人亦復云曹不可
用者音自難得正謹啓

又

雲再拜令送君苗登臺賦爲佳手筆云復更定

復勝此不知能愈之不其人推能兄文不可言
作文百餘卷不肯出之視仲宣賦集初述征登
樓前耶甚佳其餘平平不得言情處此賢文正
自欲不茂不審兄呼爾不真玄亦云兄文當作
宣輩宣得此巍巍耳愁霖喜霽殊自委頓恐此
都自易勝謹啓

又

雲再拜誨頌兄意乃以爲佳甚以自慰今易上
韻不知差前不佳者願兄小爲損益令定下

云靈旆電揮因兄見許意遂不恪不知可作蔡氏祖德頌比不景猷有蔡氏文四十餘卷小者六七紙大者數十紙文章亦足爲多然其可饗者故復是常所文耳雲頃不佳思慮胸腹如鼓夜不便眠了不可又以有意兄不佳文章已足垂不朽不足又多謹啓

又

雲再拜稽邵周弼並處事不值免詔甚切甚念之悚息胡光祿亡宿士可痛舍邠還云洛中書

散騎竝缺。是其才不知何以乃古之。謹啓

又

雲再拜頃哀思更力成歲暮賦適且畢猶未大定。自呼前後所未有。是雲文之絕無。又憶兄常云文後成者恒謂之佳。貞小爾恐數自後轉不如今。且欲寄之。旣未大定。又恐此信至。兄已發。當因著洛。謹啓。

又

雲再拜兄前表甚有深情遠旨。可耽味。高文也。

兄文雖復自相爲作多少、然無不爲高體中、不
快不足、復以自勞役耳、前集兄文爲二十卷、適
訖一十當黃之、書不工、紙又惡、恨不精謹啓、

陸清河集卷一終

新刊宋本

陸清河集

陸清河集

詩一十當黃文書不工孫文惡射不詳

外不以射以自發射耳前集只文爲二十卷

其文則射自非然也



